

rum ad imperium subditosque tuendos animus; verum etiam eximia quædam in Italia defendenda constantia inspiciebatur. Id Senatus consultum, quod non minus ad Reipublicæ, quam ad Italiæ commodum latum fuisset, Patres per Paulum Parutam, oratorem, Clementi significarunt; qui, Senatus summa prudentia, atque in christianam rempublicam pietate commendata, ei gratulatus, nascenti tum Palmæ Apostolicam benedictionem est impertitus. Nec minori lætitia oppida urbesque Reipublicæ affectæ, certatim egregiæ voluntatis argumento haud exiguum pecuniæ vim liberaliter contulere, quæ ducentum fere aureorum millium summam æquavit. Opus summo studio, atque ingenti ardore a Marco Antonio Barbaro inceptum, undique ex Galliæ Cisalpinæ ac Veneta regione agrestium hominum turba confluenta, brevi adeo excrevit, ut ad hostium conatus excipientes idoneum haberetur; continuatisque operibus ad præsentem amplitudinem firmitatemque, quam cernimus, perductum. Omnium consensu, atque eorum in primis, qui militarem disciplinam profitentur, inter præcipuas totius Europæ arces censebatur.

Dum hæc a Venetis geruntur, Byzantio Amurathem in Cæsarem bellum pronunciasse, in Pannoniæ & Croatiæ finibus copias augeri nuntiabatur. Rodolphus, ut hostis impetum sustineret, milites ex suis regnis ac ditionibus cogere, christianorum Principum subsidia flagitare. Clementis Cæsari subveniendi desiderio Galliæ turbines obstabant. Philippus Gallico ac Belgico bello, classisque turcicæ (licet minore, quam rumor attulerat, numero egressa) suspitione detinebatur. Veneti suis rebus minime conducere arbitrabantur, pacem cum Ottomanis Regibus antea sancitam turbare. Verum Pragæ indictis comitiis, a Cæsare pecunia cogebatur, delectus copiarum urgebatur, præsidia limitaneorum arcium disponebantur. Diversa ex parte Assanes Bosniæ Bassa in Duropoliam insulam illatus, cuncta populabatur; Robertus Egembergus Lubiana ad Zagabriam urbem tutandam se contulerat. At Assanes Sissacum, inter Saccam, & Culpam amnes in eadem insula situm, Canonicorum Zagabriensium ditionis oppidum, adortus, dispositis tormentis,

ver-

*Bellum entre Rodolphum Cæsarem, & Amurathem.*